

GENERAL

Gobierno a ser adverti, pero nada a ser haci

Por a evita caida di Natural Bridge?

Contesta cu lo keda sin sa



Masha, pero masha hende a bishita Natural Bridge den fin di siman, ya cu nan kier mira cu nan propio wowo, con e Monumento Natural di Aruba a keda. Mayoria comentario cu nos por a tende tabata, di ta lamenta loke cu a sosode aki. Hamas e por worde drecha, tabata e.o. algun otro comentario.

Awe mas cu nunca, e postcardnan traha di nos Natural Bridge, of esnan cu tin fotonan bieu di e Puente Natural aki, sa cu e foto of postcard cu nan tin, a bira un collecting item, masha costoso.

Combersando cu Jossy Luidens, kende tin un negoshi di famia, na Natural Bridge, el a bisa cu e ta kere cu nos turistanan lo sigui bishita e sitio aki, ya cu e guianan lo splica con e tabata un con nos Natural Bridge ta awor.

Si Jossy Luidens a bisa, cu ta como 3 pa 4 aña pasa gobierno a priminti di lo a bai haci algo cu Natural Bridge, ora cu conocedornan di e situacion di nos Puente Natural, a informa gobierno, cu mester haci algo cu e brug aki, pasobra el a cuminsa scheur. Gobierno a bisa di lo laga re-enforce, pero loke nunca a tuma lugar. Si gobierno a tende conseho di esnan cu sa di e brug aki, y si nan a haci algo, por a scapa e brug aki awe. Pero despues di a informa gobierno di e situacion, según Jossy Luidens, nada, pero nada no a tuma lugar.

Jossy Luidens a bisa tambe, cu miembronan di Monumenten Zorg tambe a bishita y analisa nos Natural Bridge, pero nan tampoco no a haci nada. Pesei awe hopi ta lamenta cu nada no a ser haci, manera custumber caba di parti di gobierno.